

S2651-7  
880

諸論

婦人方

求子  
娠妊惡阻  
養胎

千金方衍義二



孫真人千金方衍義卷一

長洲張

璐路玉著

南沙席世臣鄧客校

諸論

論大醫習業第一


凡欲為大醫必須諳素問甲乙黃帝鍼經明堂流注  
十二經脈三部九候五臟六腑表裏孔穴本草藥對  
張仲景王叔和阮河南范東陽張苗靳邵等諸部經  
方又須妙解陰陽祿命諸家相法及灼龜五兆周易  
六壬並須精熟如此乃得為大醫不爾者如無日夜



遊動致顛殞次須熟讀此方尋思妙理留意鑽研始  
可與言於醫道者矣又須涉獵羣書何者若不讀五  
經不知有仁義之道不讀三史不知有古今之事不  
讀諸子觀事則不能默而識之不讀內經則不知有  
慈悲哀捨之德不讀莊老不能任真體運則吉凶拘  
忌觸塗而生至於五行休王七曜天文並須探賾若  
能具而學之則於醫道無所滯礙盡善盡美哉

論大醫精誠第二

張湛曰夫經方之難精由來尚矣今病有內同而外  
異亦有內異而外同故五臟六腑之盈虛血脈榮衛



之通塞固非耳目之所察必先診候以審之而寸關尺有浮沉弦緊之亂俞穴流注有高下淺深之異肌膚筋骨有厚薄剛柔之異唯用心精微者始可與言於茲矣今以至精至微之事求之於至粗至淺之思豈不殆哉若盈而益之虛而損之通而徹之塞而壅之寒而冷之熱而溫之是重加其疾而望其生吾見其死矣故醫方卜筮藝能之難精既非神授何以得其幽微世有愚者讀方三年便謂天下無病不治及治病三年乃知天下無方可用故學者必須博極醫源精勤不倦不得道聽塗說而言醫道已了深自

誤也凡大醫治病必當安神定志無欲無求先發於  
慈惻隱之心誓願普救含靈之苦若有疾厄來求救  
者不得問其貴賤貧富長幼妍媸怨親善友華夷愚  
智普同一等皆如至親之想亦不得瞻前顧後自慮  
吉凶護惜身命見彼苦惱若已有之深心悽愴勿避  
嶮巇晝夜寒暑飢渴疲勞一心赴救無作工夫形迹  
之心如此可爲蒼生大醫反此則是含靈巨賊自古  
名賢治病多用生命以濟危急雖曰賤畜貴人至於  
愛命人畜一也損彼益己物情同患況於人乎夫殺  
生求生去生更遠吾今此方所以不用生命爲藥者

良由此也其蠱蟲水蛭之屬市有先死者則市而用  
之不在此例只如雞卵一物以其混沌未分必有大  
段要急之處不得已隱忍而用之能不用者斯為大  
哲亦所不及也其有患瘡痍下痢臭穢不可瞻視人  
所惡見者但發慚愧悽憐憂恤之意不得起一念滯  
芥之心是吾之志也夫大醫之體欲得澄神內視望  
之儼然寬裕汪汪不皎不昧省病診疾至意深心詳  
察形候纖毫不失處判針藥無得參差雖曰病宜速  
救要須臨事不惑唯當審諦覃思不得於性命之上  
率爾自逞俊快邀射名譽甚不仁矣又到病家縱綺

羅滿目勿左右顧盼絲竹奏耳無得似有所娛珍饈  
迭薦食如無味醺醪兼陳看有若無所以爾者夫一  
人向隅滿堂不樂而況病人苦楚不離斯須而醫者  
安樂懽娛傲然自得茲乃人神之所其恥至人之所  
不爲斯實醫之本意也夫爲醫之法不得多語調笑  
談謔誼譁道說是非議論人物銜耀聲名訾毀諸醫  
自矜已德偶然治瘥一病則昂頭戴面而有自許之  
貌謂天下無雙此醫人之膏肓也老君曰人行陽德  
人自報之人行陰惡鬼神害之尋此二途陰陽報施  
豈誣也哉所以醫人不得恃已所長專心經略財物

但作救苦之心於冥運道中自感多福者耳又不  
以彼富貴處以珍貴之藥令彼難求自銜功能  
忠恕之道志存救濟故亦曲碎論之學者不可  
之鄙俚也

論治病略例第三

夫天布五行以植萬類人稟五常以爲五臟經絡  
輸陰陽會通元冥幽微變化難極易曰非天下之  
蹟其孰能與於此觀今之醫不念思求經旨以演  
所知各承家伎始終循舊省病問疾務在口給相  
對斯須便處湯藥按寸不及尺握手不及足人迎  
跌陽





三部不參動數發息不滿五十短期未知決診丸候  
曾無髣髴明堂闕庭盡不見察所謂窺管而已夫欲  
視死別生固亦難矣此皆醫之深戒病者可不謹以  
察之而自防慮也古來醫人皆相嫉害扁鵲爲秦太  
醫令李醯所害卽其事也一醫處方不得使別醫和  
合脫或私加毒藥令人增疾漸以致困如此者非一  
特須慎之寧可不服其藥以任天真不得使愚醫相  
嫉賊人性命甚可哀傷

大百病之本有中風傷寒寒熱溫瘧中惡霍亂大腹  
水腫腸癖下痢大小便不通賁豚上氣咳逆嘔吐黃

疸消渴留飲癖食堅積癥痕驚邪癩癘鬼注喉痺齒  
痛耳聾目盲金瘡踈折癰腫惡瘡痔瘻瘤瘦男子五  
勞七傷虛乏羸瘦女子帶下崩中血閉陰蝕蟲蛇瘻  
毒所傷此皆大略宗兆其間變動枝葉各依端緒以  
取之又有冷熱勞損傷飽房勞驚悸恐懼憂恚怵惕  
又有產乳落胎墮下瘀血又有貪餌五石以求房中  
之樂此皆病之根源爲患生諸枝葉也不可不知其  
本末但向醫說男女長幼之病有半與病源相附會  
者便可服藥也男子者衆陽所歸常居於燥陽氣遊  
動強力施泄便成勞損損傷之病亦以衆矣若比之

女人則十倍易治凡女子十四以上則有月事月事  
來日得風冷濕熱四時之病相協者皆自說之不爾  
與治誤相觸動更增困也處方者亦應問之凡用藥  
皆隨土地所宜江南嶺表其地暑濕其人肌膚薄腠  
腠理開疎用藥輕省關中河北土地剛燥其人皮膚  
堅硬腠理閉塞用藥重複世有少盛之人不避風濕  
觸犯禁忌暴竭精液雖得微疾皆不可輕以利藥下  
之一利大主竭其精液困滯著牀動經年月也凡長  
宿病宜服利湯不須盡劑候利之足則止病源未除  
者於後更合耳稍有氣力堪盡劑則不論也病源須



服利湯取除者服利湯後宜將丸散時時助之  
凡病服利湯得瘥者此後慎不中服補湯也若  
湯氣勢還復成也更重瀉之則其人重受弊也若  
瘥氣力未甚平復者但消息之須服藥者當以平  
和之夫常患之人不妨行走氣力未衰欲將補益冷  
熱隨宜丸散者可先服利湯瀉除胸腹中擁積痰實  
然後可服補藥也若治虛勞應服補湯者不過三劑  
卽止若治風病應服治風湯者皆非三五劑可知也  
自有滯風洞虛卽服十數劑乃至百餘日可瘥也故  
曰實則瀉之虛則補之



夫二儀之內陰陽之中爲人最貴人者稟受天地  
和之氣法律禮樂莫不由人人始生先成其精精成  
而腦髓生頭圓法天足方象地眼目應日月五臟法  
五星六腑法六律以心爲中極大腸長一丈二尺以  
應十二時小腸長二丈四尺以應二十四氣身有三  
百六十五絡以應一歲人有九竅以應九州天有寒  
暑人有虛實天有刑德人有愛憎天有陰陽人有男  
女月有大小人有長短所以服食五穀不能將節冷  
熱鹹苦更相振觸其爲攻擊變成疾病凡醫診候回  
是不易又問而知之別病深淺名曰巧醫仲景曰凡



欲和湯合藥針灸之法宜應精思必通十二經脈  
三百六十孔穴榮衛氣行知病所在宜治之法  
不通古者上醫相色色脈與形不得相失黑乘赤者  
死赤乘青者生中醫聽聲聲合五音火聞水聲煩悶  
干驚木聞金聲恐畏相刑脾者土也生育萬物週助  
四傍善者不見死則歸之太過則四肢不舉不及則  
九竅不通六識閉塞猶如醉人四季運轉終而復始  
下醫診脈知病源由流轉移動四時逆順相害相全  
審知臟腑之微此乃爲妙也

論診候第四

夫欲理病先察其源候其病機五臟未虛六腑未竭  
血脈未亂精神未散服藥必活若病已成尙得生  
病勢已過命將難全

夫診候之法常以平旦陰氣未動陽氣未散飲食未  
進經脈未盛絡脈調均氣血未亂精取其脈知其逆  
順非其時不用也深察三部九候而明告之古之善  
爲醫者上醫醫國中醫醫人下醫醫病又曰上醫聽  
聲中醫察色下醫診脈又曰上醫醫未病之中醫  
醫欲病之病下醫醫已病之病若不加心用意於事  
混淆卽病者難以救矣何謂三部寸關尺也上部爲



天肺也中部爲人脾也下部爲地腎也何爲九候部  
各有三合爲九候上部天兩額動脈主頭角之氣也  
上部地兩頰動脈主口齒之氣也上部人耳前動脈  
主耳目之氣也中部天手太陰肺之氣也中部地手  
陽明胸中之氣也中部人手少陰心之氣也下部天  
足厥陰肝之氣也下部地足少陰腎之氣也下部人  
足太陰脾之氣也合爲九候夫形盛脈細少氣不足  
以息者死形瘦脈大胸中多氣者死形氣相得者生  
參五不調者病三部九候皆相失者死愚醫不通三  
部九候及四時之經或用湯藥倒錯針灸失度順方



治病更增他疾遂致滅亾哀哉蒸民枉死者半可  
世無良醫爲其解釋經說地水火風和合成人  
火氣不調舉身蒸熱風氣不調全身彊直諸手  
塞水氣不調身體浮腫氣滿喘粗土氣不調四肢  
舉言無聲音火去則身冷風止則氣絕水竭則無血  
土散則身裂然愚醫不思脈道反治其病使藏中五  
行其相尅切如火熾燃重加其油不可不慎凡四氣  
合德四神安和一氣不調百病一生四神動作四百  
四病同時俱發又云一百一病不治自愈一百一病  
須治而愈一百一病雖治難愈一百一病真死不治

